



**BOSNA I HERCEGOVINA**  
**VIJEĆE MINISTARA**  
*Generalno tajništvo*

Broj: 05-02-2513/13  
Sarajevo, 30.9.2013. godine

|                                                                                                                                                                                       |                       |            |              |
|---------------------------------------------------------------------------------------------------------------------------------------------------------------------------------------|-----------------------|------------|--------------|
|  <b>BOSNA I HERCEGOVINA</b><br><b>PARLAMENTARNA SKUPŠTINA BOSNE I HERCEGOVINE</b><br><b>SARAJEVO</b> |                       |            |              |
| PRIMLJENO: 30-09-2013                                                                                                                                                                 |                       |            |              |
| Organizaciona jedinica                                                                                                                                                                | Klasifikaciona oznaka | Radni broj | Broj prijema |
| 01                                                                                                                                                                                    | 02-02-1-45/13         |            |              |

B

**PARLAMENTARNA SKUPŠTINA BiH**  
- Zastupnički dom -  
- Dom naroda -

**SARAJEVO**

**PREDMET:** Prijedlog zakona o neradnim danima u vrijeme blagdana

Vijeće ministara Bosne i Hercegovine, na 64. sjednici održanoj 18.9.2013. godine, utvrdilo je Prijedlog zakona o neradnim danima u vrijeme vjerskih blagdana u Bosni i Hercegovini, te zaključilo da se isti uputi Parlamentarnoj skupštini Bosne i Hercegovine uz prijedlog da se razmatra po temeljnom zakonodavnom postupku.

U svezi s navedenim, u privitku dostavljamo Prijedlog zakona o neradnim danima u vrijeme vjerskih blagdana u Bosni i Hercegovini, na bosanskom, hrvatskom i srpskom jeziku, kao i elektroničku verziju Prijedloga zakona.

S poštovanjem,

  
**GENERALNI TAJNIK**  
*Zvonimir Kutleša*

Na osnovu člana II. 3. g) i IV. 4. a) Ustava Bosne i Hercegovine, Parlamentarna skupština Bosne i Hercegovine, na \_\_\_\_ sjednici Predstavničkog doma, održanoj \_\_\_\_\_ godine, i \_\_\_\_ sjednici Doma naroda, održanoj \_\_\_\_\_ godine, usvojila je

**ZAKON  
O NERADNIM DANIMA U VRIJEME VJERSKIH PRAZNIKA  
U BOSNI I HERCEGOVINI**

**Član 1.  
(Sadržaj Zakona)**

Ovim zakonom određuju se neradni dani u vrijeme vjerskih praznika u Bosni i Hercegovini za zaposlene u svim institucijama, organima, organizacijama, preduzećima i svim drugim oblicima organiziranja za obavljanje djelatnosti i usluga na teritoriji cijele Bosne i Hercegovine.

**Član 2.  
(Neradni dani zaposlenih u vrijeme vjerskih praznika)**

(1) Neradni dani u Bosni i Hercegovini određuju se u vrijeme vjerskih praznika kako slijedi:

- a) za pripadnike islamske vjere: 1 (jedan) dan za Novu hidžretsku/muslimansku godinu, 1 (jedan) dan za dan rođenja Muhameda, 1 (jedan) dan za Ramazanski bajram i 2 (dva) dana za Kuranski bajram;
- b) za pripadnike katoličke vjeroispovijesti: 1 (jedan) dan za Bogojavljenje, 1 (jedan) dan za Tijelovo, 1 (jedan) dan za Uznesenje Blažene Djevice Marije ili Velika Gospa, 1 (jedan) dan za Svi Sveti i 1 (jedan) dan za Božić;
- c) za pripadnike pravoslavne vjeroispovijesti: 1 (jedan) dan za Božić, 1 (jedan) dan za Svetog prvomučenika i arhidakona Stefana, 1 (jedan) dan za Duhove, 1 (jedan) dan za Veliki petak i 1 (jedan) dan za Vaskrs;
- d) za pripadnike jevrejske vjeroispovijesti: 1 (jedan) dan za Sukot, 1 (jedan) dan za Šavuot, 1 (jedan) dan za Pesah, 1 (jedan) dan za Roš Hašana (Nova godina) i 1 (jedan) dan za Jom Kipur (Dan pomirenja);
- e) za pripadnike ostalih vjera u Bosni i Hercegovini 5 (pet) dana u godini za potrebe obilježavanja vjerskih praznika.

(2) Ukoliko neki od dana utvrđenih u stavu 1. ovog člana pada u nedjelju, neradni dan će biti i prvi naredni radni dan.

**Član 3.  
(Naknada plaća zaposlenih)**

U neradne dane utvrđene članom 2. ovog zakona zaposleni imaju pravo na naknadu plaće – plaćeno odsustvo.

**Član 4.**  
**(Neradni dani institucija, organa, organizacija,**  
**preduzeća i drugih pravnih lica)**

Ukoliko priroda djelatnosti, odnosno tehnologija procesa rada zahtijeva neprekidan rad, Vijeće ministara Bosne i Hercegovine, odnosno vlade entiteta i Brčko distrikta Bosne i Hercegovine ili drugi nivoi vlasti, u skladu sa svojim nadležnostima, mogu odrediti koje institucije, organi, organizacije, preduzeća i drugi oblici organiziranja za obavljanje djelatnosti i usluga su dužni raditi i u kojem obimu na dane praznika utvrđenih ovim zakonom.

**Član 5.**  
**(Usklađivanje drugih propisa s ovim zakonom)**

(1) U roku od šest mjeseci od dana stupanja na snagu ovoga zakona, entiteti i Brčko distrikt Bosne i Hercegovine obavezni su svoje zakone o praznicima uskladiti s ovim zakonom, s tim da u tim zakonima mogu, prema svojim potrebama i specifičnostima, utvrditi i druge datume kao praznike u entitetu, odnosno Brčko distriktu Bosne i Hercegovine i odrediti prava u te dane odsustvovanja s posla.

(2) U roku od šest mjeseci od dana stupanja na snagu ovog zakona uskladit će se odredbe člana 30. st. (1) i (3) Zakona o radu u institucijama Bosne i Hercegovine („Službeni glasnik BiH“, br. 26/04, 7/05, 48/5, 60/10 i 32/13) sa odredbama ovog zakona.

**Član 6.**  
**(Stupanje na snagu ovoga zakona)**

Ovaj zakon stupa na snagu osmog dana od dana objavljivanja u „Službenom glasniku BiH“.

Broj \_\_\_\_\_  
\_\_\_\_\_ godine  
Sarajevo

**Predsjedavajući**  
**Predstavničkog doma**  
**Parlamentarne skupštine**  
**Bosne i Hercegovine**

**Predsjedavajući**  
**Doma naroda**  
**Parlamentarne skupštine**  
**Bosne i Hercegovine**

## **O B R A Z L O Ž E N J E**

### **Zakona o neradnim danima u vrijeme vjerskih praznika u Bosni i Hercegovini**

#### **I. USTAVNI OSNOV**

Ustavni osnov za donošenje ovog zakona sadržan je u članu II 3. g) Ustava Bosne i Hercegovine prema kojem sva lica na teritoriji Bosne i Hercegovine uživaju ljudska prava i slobode iz stava (2) ovog člana, što uključuje i slobodu misli, savjesti i vjere, kao i u članu IV 4. a) Ustava Bosne i Hercegovine, prema kojem je Parlamentarna skupština Bosne i Hercegovine nadležna za donošenje zakona potrebnih za provođenje odluka Predsjedništva Bosne i Hercegovine, ili za vršenje funkcija Parlamentarne skupštine prema Ustavu Bosne i Hercegovine.

#### **II. RAZLOZI ZA DONOŠENJE ZAKONA**

Od stupanja na snagu Ustava Bosne i Hercegovine, na nivou države Bosne i Hercegovine ne postoji, odnosno do sada nije donesen zakon o neradnim danima u vrijeme vjerskih praznika.

Također ni na nivou Federacije BiH nema, odnosno do sada nije donesen zakon o praznicima, ali je na snazi preuzeti Zakon o praznicima Socijalističke Federativne Republike Jugoslavije („Službeni list SFRJ“, br. 6/73).

U Republici Srpskoj na snazi je Zakon o praznicima Republike Srpske („Službeni glasnik Republike Srpske“, broj: 43/07).

U Brčko distriktu Bosne i Hercegovine na snazi je Zakon o praznicima Brčko distrikta Bosne i Hercegovine iz 2002. godine.

Kako narodi i građani Bosne i Hercegovine prema religijskoj pripadnosti i tradiciji obilježavaju različite vjerske praznike, nameće se potreba da se i državnim zakonom priznaju navedene razlike, te da se najznačajniji praznici konfesija naroda i građana u Bosni i Hercegovini proglase neradnim danima u Bosni i Hercegovini. Uz to potpisani su i ratificirani Osnovni ugovor između Bosne i Hercegovine i Svete Stolica s Dodatnim protokolom (objavljen u „Službenom glasniku - Međunarodni ugovori“, broj 10/07) i Osnovni ugovor između Bosne i Hercegovine i Srpske pravoslavne crkve (objavljen u „Službenom glasniku - Međunarodni ugovori“, broj 6/08). Ovim ugovorima preuzeta je obaveza da će se posebnim zakonom/zakonima Bosne i Hercegovine kao neradni dani urediti navedeni praznici/vjerski praznici za katolike odnosno pravoslavce u cijeloj zemlji.

Svi naprijed izneseni razlozi govore o potrebi donošenja Zakona o neradnim danima u vrijeme vjerskih praznika u Bosni i Hercegovini.

Pri provođenju konsultacija u vezi s ovim zakonom, a imajući u vidu i međunarodne ugovore koje je Bosna i Hercegovina potpisala sa Svetom Stolicom i Srpskom pravoslavnom crkvom, ukazala se potreba da se ovim zakonom propišu neradni dani za vrijeme najvažnijih vjerskih praznika svih vjerskih zajednica zastupljenih u Bosni i Hercegovini.

U tom smislu konsultirano je Međureligijsko vijeće u Bosni i Hercegovini koje je izrazilo svoj stav o vjerskim praznicima kao neradnim danima. Stav tog vijeća je bio da Katolička crkva u

Bosni i Hercegovini nije kontaktirana, jer je to pitanje riješeno zaključenim Osnovnim ugovorom između Bosne i Hercegovine i Svete Stolica, a da su ostale vjerske zajednice predložile kako slijedi:

a) Islamska zajednica za svoje vjernike: 1 (jedan) dan za Novu hidžretsku/muslimansku godinu, 1 (jedan) dan za dan rođenja Muhameda, 1 (jedan) dan za Ramazanski bajram i 2 (dva) dana za Kurbanški bajram;

b) Srpska pravoslavna crkva za svoje vjernike: 1 (jedan) dan za Božić, 1 (jedan) dan za Svetog prvomučenika i arhiđakona Stefana, 1 (jedan) dan za Duhove, 1 (jedan) dan za Veliki petak, i 1 (jedan) dan za Vaskrs;

c) za vjernike jevrejske vjeroispovijesti: 1 (jedan) dan za Sukot, 1 (jedan) dan za Šavuot, 1 (jedan) dan za Pesah, 1 (jedan) dan za Roš Hašana (Nova godina) i 1 (jedan) dan za Jom Kipur (Dan pomirenja).

Za pripadnike ostalih vjera u Bosni i Hercegovini predviđeno je 5 (pet) dana u godini za potrebe obilježavanja vjerskih praznika.

### **III. OBRAZLOŽENJE PREDLOŽENIH PRAVNIH RJEŠENJA**

#### **Član 1.**

Ovim članom Zakona uređuje se da su predmet ovog zakona neradni dani u vrijeme vjerskih praznika na teritoriji cijele Bosne i Hercegovine.

#### **Član 2.**

Kao neradni dani na teritoriji cijele Bosne i Hercegovine obuhvaćeni su i najznačajniji vjerski praznici/svetkovine/blagdani pripadnika svih vjerskih zajednica zastupljenih u Bosni i Hercegovini. Ovim predloženim rješenjem stavljeni su u ravnopravan položaj pripadnici svih vjeroispovijesti u Bosni i Hercegovini, to jest da pripadnici svih konfesija zastupljenih u Bosni i Hercegovini kroz svoje vjerske zajednice imaju pravo na plaćeno odsustvo s rada u dane vjerskih praznika i to svi u trajanju od 5 (pet) dana u toku jedne kalendarske godine. Predloženo rješenje ne utječe na slobodu izbora pojedinaca da i korišćenjem dana godišnjeg odmora ili drugoga slobodnog dana (plaćenog ili neplaćenog odsustva, a u skladu s propisima o radnim odnosima u entitetima i Brčko distriktu BiH), na naročit način obilježe i druge vlastite značajne vjerske datume.

#### **Član 3.**

Ovim članom predviđeno je da zaposleni imaju pravo na naknadu plaće (plaćeno odsustvo) u dane kada ne rade u skladu s ovim zakonom.

#### **Član 4.**

Predviđen je način obilježavanja praznika u Bosni i Hercegovini u onim slučajevima kad su zajednice, u kojima su zaposleni vjernici, dužne raditi na dane praznika utvrđenim članom 2. ovoga zakona.

#### Član 5.

Ovim članom predviđen je rok u kome entiteti i Brčko distrikt BiH trebaju uskladiti svoje zakone o praznicima i neradnim danima s ovim zakonom, s tim da im se ostavi mogućnost da, prema svojim potrebama i specifičnostima, svojim zakonima mogu utvrditi i druge praznike na svojoj teritoriji.

Takođe, članom 5. je predviđeno da se u roku od šest mjeseci od dana stupanja na snagu ovog zakona usklade odredbe člana 30. st. (1) i (3) Zakona o radu u institucijama Bosne i Hercegovine („Službeni glasnik BiH“, br. 26/04, 7/05, 48/05, 60/10 i 32/13) sa odredbama ovog zakona.

#### Član 6.

Propisan je dan stupanja na snagu ovoga zakona, kao i objavljivanje istog u „Službenom glasniku BiH“.

### **IV. FINANSIJSKA SREDSTVA ZA PROVOĐENJE ZAKONA**

Za provođenje ovoga zakona nisu potrebna nikakva dodatna i posebna finansijska sredstva.